

## Fedoroacha letoi leinjiin

### *Inara coaaucaun.*

1-2 Canuna Jesocurisito letono afosoto Fedoro neeun. Inae jauriaalu caje coauneein coaasihalu cana Inaca Cana Coaunerane rijijieein nii niicha ranojoinequichene, Poonto, Galasia, Capadosia, Asia, Bitinia, naaonjoainuri batane que cuhin inara atane udaa riaaneein neinequichene raine caa quiricha laenaain letoaaun. Nitohaneein rai cachaneein naitoonjoan tonoraain neeichene cointate, jelai teein rai Suujue que inara suujue teein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoein neeichene cointa.

### *Itolere bana canaacha cohajei ichaonaa*

3 Cairichaaajoaain cana coaraain, cana coreniha ohane baiha caje ichanaa Jesocurisitone aina cuaain, nacoaauneein ena nejanoaain nenea rijijieein nenea jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunerate itolere bana canaacha cohajei ichaonaanaja tereein cana rai. 4 Chaen techu aca inara que banihateein dedeeu Cana Coauneraacha rucujuei- nii ichaonaa caohacha inaraacha cohajei tereein. Nii inara rai niicha teeni nii chatohaneein nitajenaa nainerinaain. 5 Nitohaneein esinae rauhijiriin

inara ichoteraterichaain Cana Coaunerane esenetaain neeichene jaunte, niicha ichana nainei ichaain inara beraicheein, jianacoon neein nii inara ichoteraterichaaine jaan que turuhichene, inara que banihateein niicha rucujuei coitucueratiha inae ecu tihane bana inara quene coina.

<sup>6</sup> Nitohaneein neriquicheeine jaunte, raotojoein rachoojoein neeiche ena, itolere que coujunojoneein cairichanojoneein neeichene nihanatiin. <sup>7</sup> Charijieein teeinti usihanau oro teein mocoore caje mituha baasone coina, nii rijijieeinte inara netonai coujunojoneein neriquicheein. Inae nitohaneein coujunojoneein coanojoneequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajiin neeichenete, nii jataain coreti- nitaje rai nena oro amurijiriin nelateineein neriquicheein. Nitohaneein coujunojoneein neeichene abaantaain laraajiin neeichenete, coroaenojoneein neriquicheein inae turuha cana Curuaanaa Jesocurisitone bana.

<sup>8</sup> Coatiha niqui charijibana Jesocurisito coaraain niheeiche inara. Nete coara rijitoein jataain belaa inoroajein rachoojoein neeiche. Chaen techu, “Naaonjoaan,” naain inara ere nejesinaacha que benaa nainiheeiche, jataain necaohachanaa nihane jaun. <sup>9</sup> Nitohaneein inae ichoteratenojoneein niha inara suujuene jaunte, raotojoein rachoojoein neeiche. Nitohaneein neeichene coinata Jesocurisito esenetaain neeiche.

<sup>10</sup> Nitohanihane coinata inoanlu caje

coaauneein jianacoon cana ichoteraanu que cuaaïn caohachaain coitucuuruhanē coina que nerelaain, cairichaaōjoaain cana coaraain ichoteratenojoi nichaachene jaanu terichaaïn cana rai Cana Coaunerane beebejerejetecurelu *profetacuru*. <sup>11</sup> Nitohaneeinte inae jauriaalu caje coaauneein *profetacuru* que coitucueratelū Jesocurisito Suujue, ateinaauruhane baiha nacoaauneein ichanaain rai caohacha icharaanu que tiha Cana Coaunerane coitucueratelū. Nii jaunte niq̄i: “Charijicha nii aicheein. Chatohanai banacha aicheein,” naain niq̄i coitucunaa jerecure, acauru que coitucueratiha Cana Coaunera Suujuene jaun. <sup>12</sup> Nete acauru rainein nenerihani nii Cana Coauneraacha beratenojoi- inara rai caohachaneein neeninu coitucueratelū acauru que Cana Coaunera. Nii jaunte nii ichoteratenojoinēein neeichene jaan, inae inara que coitucuerateēure nii Ena Nēnaa Cana Coaunera Ere beracuru dede caje letononeein nēnaa Cana Coaunera Suujue aina cuaaïn. Niite niq̄i jataain caohatiin coaraain coitucunaa jerecurelu Cana Coaunera letono anjeraauru netonai.

*Esinae rauhijiriin aca jerihane rijjīeein ichaonaa cōinate cana cotijiaain ne Cana Coaunera.*

<sup>13</sup> Nitohanihanē jaun jatoraain niicha que coacuhin coujurihu inara suujua coaraain, nacoauneein turuha uha Jesocurisitone jana inara rai Cana Coauneraacha tenaa jereiicha que jaequīin neeuche. <sup>14</sup> Coujuriu Cana Coaunera calaohineein nēnaa tocohanein

naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijieein ichaohichelune rijijieein ichaohichene. <sup>15</sup> Nitohaneein ichoaelanaala, Cana Coauneraacha que banijiaaenein saantoneein ichaaoche, nii inara cotihara acaihanejei Cana Coauneraacha Saantoneein nihane jaun. <sup>16</sup> Nitohanihane jaunte rai Quiricha inoaensi cuhane: “Acaihanejei inara Coauneraneein Saantoneein nihanune jaun, canu que banijiaaenein saantoneein leinjiin canuhacha cachaneein ichaaoche,” nae Cana Coaunera.

<sup>17</sup> “Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuhereein nihane coitucuhin esenetaain ichaohichene coarateein ichaaoche, jaiti cau chauratane que ichaonaa que neein.

<sup>18</sup> Inara foerateracuru ichao rijijieein nii chaque nelatelanaala nitaje rai nenea ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nenea oro, coriqui, naaonjoain que coretenohineniha nii inara ichaone raotojoein coitucuhiche. <sup>19</sup> Nitohaneeinte caohatiin chaeloon baasoneerilanaala nenea carenero narejeen sohin acauru osa coreniha coichana terejetocuruhalu cana inoaensihurune rijijieein, nii chaeloon osaojoejelanaala nenea Jesocurisito sohin, coichana jataain necaohachaain nenea que coretenojoineein ne nii inara ichao. <sup>20</sup> Inae nitohaneein cana coreniha orichaaaine cointate jaiti necoauaeniha cana rai chauratanene ajiniha caje coauneein nesilu Cana Curuaanaa

Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu. <sup>21</sup> Jesocurisito aina cuaainte, nii oo caje ichateein rai caohacha icharaanu teraneein nenea Cana Coaunera coitucuhin esenetaain neeiche. Nitohaneein inara coroatajaneranein niha Cana Coaunerane jaunte, leinjiin acaacha cohajeein que jaaequiin neeiche.

<sup>22</sup> Inae nitohaneein Cana Coaunera beratenojoi esenetaain tonoraain neeichene jaunte, inae couluunojooinein ne inara suujue, jataain inara suujua aina cutaain jiniiquiin Jesocurisito ranojooinein nenacaauru canejeraauru aina ita belaaain neeichene coina. Nitohaneein le cacha nequichene atiin ita acatiha tacaain, inara suujua aina cutaain ita belaaain neeuche, nii baaso coacuelanaala. <sup>23</sup> Enate nacoaaunein nejanoaain nenea rijijieein neeiche. Coatiha cacha onaa inaeranein nenea jaberoco caje nii nejanoaheeiche. Cana Coaunera Ere chabana nitajenaa charanejeein satonoelanaala nenea aina cuaainte nii nacoaaunein nejanoaiche. <sup>24</sup> Nitohanihane cointate: “Satiin cachate nejanoaain fojooein ichauhenaneein inae biinaanihane ohe. <sup>25</sup> Nete laen Cana Coaunera ere nii charijibana satonoelanaala nereein,” naain laenanohinein ne Cana Coaunera Quiricha cuhane. Nii inara rai beratenojooinein nenea Erenaa esenetaaichene jaunte, inae ichoteratenojooinein neeiche.

## 2

<sup>1</sup> Inae nitohaneein ichoteratenojooinein

neeichene coina, inara rai beratenojoin Erenaa esenetaaichene jaun, jauriaalu baasoneein ichaohin inara amute cacha cairichaa nohaneein, necoelajauharitiin, inara amute cacha cotaairiichene nihanatiin belaicha rijitjoein rai ereein neeichene coarateein neeichene jianein neeuche. <sup>2</sup> Aiha ena nejanoanaa canaanai ujuari, itaariicha que coacuhine rijijieein, Cana Coauneraacha jerei que coacuhin, aca jerihane rijijieein ichaohin, inara suujua ilaachete ichoteratenojoein neeiche. <sup>3</sup> Nitohaneeinte neriquicheein, esinae rauhijiriin caohacha teranein niha Cana Coaunerane coitucuhin esenetaain neeichene.

*Ajeri neloheriteeuruhane jaan rijiicha Curisitone que cuaain acaauru relaa Fedorone.*

<sup>4</sup> Nii Cana Coaunera rai ajeri ichaohin nenea Jesocurisito, nii chaque nelatihei rijijieein jaolecohin neeuruhalu Isaraelitaacurune jaancha que coacuhin raaicha nelateein neeuche. Nitohanein nelatihei rijijieein coaracuruhane sainejeeinte, ajeri ichaohin jataain itolere que nelatineein janijiin Cana Coauneraacha tenojoein nenea ne. <sup>5</sup> Nirijieein techu esinae rauhijiriin aca jerihane rijijieein ichaohichene-ajeri ichaohin nenea caje Cana Coaunera lorerineein ichanohin Teenforo rijijieein rai saseredote esine neein Cana Coauneraacha jerei ichajeein saantoneein neriquicheein. Nete inoaenlu aichejetocuruha saseredotecurune rijijieein, carenerocuru sohin coichana teranein nenereicheein. Inarate Jesocurisito aina cuaain Cana Coauneraacha jereineein, rai

cachaauru suujuateraneein neriquicheein.

<sup>6</sup> Nitohanerichaaine quete:

“Sioon neseeeune, ajeri jataain nelateinnein nena quicha janijii teeun.

Aihana jaun esinae rauhijiriin

caohachaniha nii ajeri quicha teeine coitucuhin esenetaain nena que

chabana jaolecorinaauni,”

naain laenanohineein ne Cana Coanera Quiricha kuhane.

<sup>7</sup> Cana, esenetaera nichaachene rai nii Cana Coaneraacha tei ajerite jataain nelateinnein ne. Nete Cana Coanera Quiricha kuhane laen nii esenetaelanaala nenacaauru que:

“Jaolecooraha loreri icharaaurune jaan ajerite, loreri nunuheneein temuranein nerotoha cureein.

<sup>8</sup> Acate leinjiin ajeri jaberoconein lacurocuhane jaanein nereein,”

naain laenanohi nihane rijijieeinte, inae lacurocure, nitohaneeuruhane coina inae ichanohinein neeuruhane jaun.

<sup>9</sup> Nete inara le lauriineechene, Cana Curuaanaa rai saseredotenein niicha janijineein, Cana Coaneraacha jereinein rai cachaneein neeiche. Nitohaneente inara raain nelu Cana Coanera, jataain rai caohachaneein nena niicha beratei beeiche leochaauru raine coina. Acate nocohenaanau nena rijijieein neeichene jana,

inara cotijiaain nelu, rai caohachaneein nena Cojoanona que neeichene coina. <sup>10</sup> Jauriaalu niqui cairichaojoaain inara coaraain niheiluu Cana Coanera, rai cachaneein neneeichene jaun. Nete inae enene rai cachaneein neeichene

jaun, inae cairichaaajoaain inara coarae Cana Coaunera.

*Cana Coauneraacha icharatei ichajeein ichaaoche*

<sup>11</sup> Canejeraauru, atiin inara suujua coaraain, inae nejelau cachanequichene ichao que ichaaoche, nabana nitajiha inara suujuene coataa.

<sup>12</sup> Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coarateein neeuche. Nitohaneein ichaohichenete, baaso ichara niha inara beeuruhane nihanatiin caohacha ichaquichene coaraain Cana Coaunera coroaecurureein, inae le cachaniquichene caje inaraacha ichanohi rucuhecane cojoanona que turuhane bana.

<sup>13</sup> Inae Cana Coaunera cachaneein neeichene jaun, satiin inara amute cachaauru-cocainanacainein nenacaauru ere tonoraain neeuche. Chaen leeochoauru cocainanacaihuru amuritoheriin cocainanacainein nena enferadoro ere tonoraain neeuche.

<sup>14</sup> Nii rijijieeinchu nii rai letonocuru- baaso icharaauru casetecaain caohacha ichaeraauru coroaeraneein nenacaauru ere tonoraain neeuche.

<sup>15</sup> Nitohaneein neeichenete jere Cana Coaunera, nabana tonaain ereeuruha inara que caohacha ichaera cacha nocoeje chanuheriin ichaonacaauru aina cha coitucuhichuru cachaaurune coataa.

<sup>16</sup> Inaraacha jerei ichana nainequiche niqui. Nete laen nii inaraacha ichai aina cuaain naineneeiche leeochoauru rai baaso ichaquichene. Aihana jaun coujuriu Cana Coaunera cachaneein caohacha ichaain neeuche.

<sup>17</sup> Satiin que inara suujua acateein jiniiquiin ita belaaïn- jeriha Cana Coaunerane rijijieein neeïn-enferadoro que inara suujua acateein neeuche.

*Cana relaeranu que necairichaain nihalu Curisitone*

<sup>18</sup> Nitohanihane jaun rai fatoroon ere tonoraain aca jerihane rijijieein neeine letononeein nena. Jiaonriha caohachaaïn belaaïn aca jerihane rijijieein sirihã fatoroone jauhanchã nere tonoraain nihane. Nechu aansaineeïn cotaitiïn niha fatoroone nihanatiïn nere tonoraain neeine.

<sup>19</sup> Jeriha Cana Coaunerane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiïn, jianelanaala abaantaacachenete jataain caohate.

<sup>20</sup> Jana esinae rauhijiriin baaso ichaquichene coreniha inara casetecaain neeuruhane abaantaain neeichene, coatihã caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaachene Cana Coaunera notaracaae caohacha ichaa airiquicheein.

<sup>21</sup> Nitohaneein neeichene cointe, inara cotijiaain nelu Cana Coaunera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche.

<sup>22</sup> Coatihã niqui aansijieeiniji osa que nesaruhin nihei chuni coritaain niheilũ Curisito.

<sup>23</sup> Niheichu nocoejehanuuruhane nihanatiïn coatihã acauru nocoejehanuhin nerejetohilu. Niheichu cairichaauruhane nihanatiïn tonaain ereein nerejetohilu. Cana Coaunera esinae rauhijiriin

baaso icharaauru coitucuhin nii rucuhecane coinaachate aitoraaetelu. <sup>24</sup> Nii Curisitote jaberoco aina cuaain cana osa amaaain coroso que ohin aina jiniiquiin cana osa atinaelu, aina cuaain ichaonaa esine que ichaohin osa colane nenea coina. Nitohaneeinte cana osaacha que nesarujueein nihacachene caje cana mitaeranu que coroso que ohelu Curisito. <sup>25</sup> Jaurihaalute niqui aiha beraicha colane nenea carenerone rijijieein nitajenaa neein nerejetocooachelu. Nete laen inae ena carenerocuru beraiha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichaohiche.

### 3

#### *Naaonjoaai ichaaoruhine sinijeraaonacaauru.*

<sup>1</sup> Aihana jaun inara lanaauru ere tonoraain neeuche enecuru. Aihute inara ichao cajecha coaraain, acaauru rai erenaa latelanaala, nii Cana Coaunera beratenojoin erenaa coitucuhin esenetaain neeuruhine esenetana jerelanaala nenacaauru inara lanaauru, <sup>2</sup> esinae rauhijiriin caohachaaain neein, nii baaso ichaelanaala inara suujua acateein ichaohichene coaracuruhane. <sup>3</sup> Esinae rauhijiriin caohachaaain nenea jeriquichene, nii nitajenaa inaurera rucuhele oro caje ichanohichuru, cajione caohachaaauru, naaonjoainuri que coacuelanaala, <sup>4</sup> inara suujua aina cutaaain esinae rauhijiriin Jesocurisito suujue que coacuhin neeuchete raotojoein neeiche. Caohachaaain Cana Coaunera notaracae nihacanete jataain

nelate. <sup>5</sup> Nii rijijieein techu nerejetocure cana inoaensihuru benecuru- jeriha Cana Coaunerane rijijieein ichaonacaauru. Nitohaneein jeriha Cana Coaunerane esenetaauruhane jaunte, jeriha acaauru lanaaurune rijijieein acaauru ere tonoraain neeurelu nii acaauru benecuru. <sup>6</sup> Nitohanihane jaun techu: “Canu curuaanaa,” narejete lana Abaraaun rai Sara, nere tonoraain aca jerihane rijijieein nihane jaun. Nii aihalu Sarane rijijieein casilanaala coejelanaala neeichenete, rauhijiriin coujuriu nii Abaraaun aina Sara nefoerateneein nena rijijieein neriquicheein.

<sup>7</sup> Jana inara acaauru lananequichene, jeriha inara sinijeraaurune rijijieein jiniiquiin ita suujua rijijieein neeuche. Coa ene neeuruhane amihaneon amurijiriin, inara sinijeraauruhacha ichanenu teein nihache. Inara rijijieein acaauru caohachane quete, nitohaneein acaauru rai ichaonaa teein nelu Cana Coaunera. Aineeichenete Cana Coaunera bajaain neeichene, inara ere tonoraenereein Cana Coaunera.

*Satiin Cana Coaunera ranojoineein nenacaauruhacha ichanenu*

<sup>8</sup> Aihana jaun ita suujua rijijieein neein ita janojera rijijieein ita belaaain, leeochoauru coroatajaneein, nii leeochoauru amurijiriin nena coacuelanaala neeuche. <sup>9</sup> Jiaonriha tonaain baasoneein inara que ereein neinihane, nii tonaain que baasoneein ereeichene. Niheichu inara nocoeje chanuheranihane, coa inara netonai nocoeje chanuhache. Nitohanenaa coacuelanaala acaauru rai caohacha ichacuche.

Nitohaneein inara rai caohacha ichaane coina inara raain nihalu Cana Coaunerane rijjijeein.

<sup>10</sup> Nii cointate:

“Chunocoha nichao colalajiin  
raoti ichaonaa que ichaonaa jerihane,  
namute cacha que baasoneein erelanaala,  
nii casajenelanaala,

<sup>11</sup> baasoneein ichaonacaauru aina nelanaala,  
caohachaacha ichaain  
raotojoein ichaohane jaanuhacha ariin  
acaacha sacuhine.

<sup>12</sup> Cana Coaunerate  
caohachaain suujua coaraain ichaonacaauru be-  
raichaneein nihane jaun,  
bajaauruhane aonaain ne.

Nete laen baaso ichajeein ichaonacaauru que  
jaoleconaa rijjijeein ne,”  
naa Cana Coaunera Quiricha inoaensi cuhane.

<sup>13</sup> Nitohaneein itolere bana caohacha nejesinaacha que coacuhin neeichene, nerihei inara rai baaso ichara. <sup>14</sup> Nete laen caohacha ichaquichene coreniha necairichanaa coaraquichene nihanatiin rachoojoein nerausiaejeein neriquicheein. Jiaonriha nii chuni que casiin nesooneein neeichene. <sup>15</sup> Nesoonenaa coacuelanaala raujiaaincha inara suujua cuhane Cana Curuaanaa Jesocurisito coacuhin bajaebajaecuche. Chaen letona jatoroain neeuche chunocoha inara caje, “Chatohanihana nii jaecoichene jaan,” naain bajaa inara cajene, raotojoein belaaain beeuchete coitucuhin neeine. <sup>16</sup> Nete acaauru amurijiriin nena coacuelanaala, acaauru que inara suujua acateein acaauru rai beeichene caohachae. Nitohaneein coujuriu

Jesocurisito esenetaeraneen caohacha nejesina ichaain neeuchete nocoejecurumiin inara que baasoneen erenacaauru.

<sup>17</sup> Baaso ichacaachene coreniha necairichanaa coaracaachene amuritoeriinteja nenaacaeneen caohachae caohacha ichacaachene coreniha necairichanaa coaracaachene, nitohaneei jeriha Cana Coaunerane jaun. <sup>18</sup> Nii rijieein techu Jesocurisito netonai lesajeeincha cana osa coreniha cairichanojineen ohin nelu. Coatiha niqui nii chatohanai baaso ichaain osa que nesaruhin niheilu aca, nete erenaa tonoraelanaala baasoneen ichaonacaauru coreniha necairichaain nelu, rai Inaca Cana Coaunera rene cana amaane coina. Joaenreein cacha rijijieeinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoein ichaohin ne. <sup>19-20</sup> Nitohaneeinte suujue nejesinaneen cuhin, acau tabai itajenojineen moconajaera casetecanohineen nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunerane sainejееin, esenetaaurenihane jaun nitajeeurelu. Acaauru tabaauru esenetaeraauruhachate, itolereneen fosanejееin acau tabai caje nichoteeurelu. <sup>21-22</sup> Nii acute cana osa jianeen ichaohacachene coina baotisanjoinichaane jaa cojunacaneen nenaanelu. Nii aina cuaainte, inae ichoteratenojineen nihacache cana netonai. Coatiha raujiaain culuonjoiniha cana jaberocone coina baotisanojoi nihaacache. Acate raujiaain cana jaberoco coulocohin, oo caje ichanaai dedeeu cuhin Cana Coaunera

raotono nichajai que neein, itolere anjeraauru amurijiriin, cocoainanacaihuru amurijiriin nihane coina nenea Jesocurisito aina cuaain, aina nenea coina cana suujue coulooca Cana Coaunerane jaan neein ne.

## 4

*Cana Coaunera tenojoi inaraacha ichana nainei que leeochoauru coroatajanecuche.*

<sup>1</sup> Aihane jaun cana coreniha jaberoco cairichaaain nihalu Curisitone rijijieein, inara netonai necairichanaa coaraqichene coina jatoraaain neeuche. <sup>2</sup> Suujua letono rijijieein ichaohane jianeein Cana Coaunera jerenohicha ichaane coreniha necairichanaa coaraain neite osa caje nichotereein. <sup>3</sup> Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneeichene jaunte, jataain baasoneein ichaohin, inara suujua coaraelanaala necha ansaineein nerejetocoichelu, jianelanaala cocohin, tonijiaain ichaain ajenacaauru aina niha natiin neein, nii ichanohichuru ecaantooruniha natiin coroajeein, naaonjoaain nerejetocoichelu. <sup>4</sup> Nete laen inae enene, chabana jianelanaala baaso ichaain nenacaauru aina ichaorejetocoichene jianequichene jaun, inae inara coaracureniha acaauru aina nejaun inara cojoelatiin inae baasoneein inara que ereeure. <sup>5</sup> Nete inae ecu tihane bana onacaauru, ichaohin nenacaauru, naaonjoainuriicha ichai coitucuhin nii rucuheraanu que nenea cojoanona que tihane bana, raajenihane

niicha ichai biha cuurureein. <sup>6</sup> Nii onacaauru raite Cana Coanera ere berejetecurelu, ohin neeuruhane nihanatiin aitoaha Cana Coaneranane rijijieein suujue nejesinaneein ichaohin neeuruhane caina. Jerichanejeein techu niqui, aitocuruha cachaaaurune rijijieein caohacharelu jaiti jaberoconeein neeuruhane bana rucuhenohinihalu niine.

<sup>7</sup> Inae satonoha itolerene que tururichaje. Aihane jaun inara que Cana Coanera icharatenohin ichajeein Cana Coanera bajaee bajajeein ichaaoche.

<sup>8</sup> Itolereneein inara suujua aina cutaain jiniiquiin ita belaaichaaoye. Jataain ita belaaichaaoye arajii rai nosa que suujua acatereein Cana Coanera. <sup>9</sup> Inara rene turuhin niha chunine tonaain leeochoaauru que erenaa coacuelanaala inara loreri asaae raauche.

<sup>10</sup> Coujuriu lauri lauri inara que Cana Coaneraacha icharatenohi icharaneein nena tocohaneein, ichana nainequichene rijijieein inara rai Cana Coaneraacha tenojoi aina cuaain leeochoaauru coroatajanecuche.

<sup>11</sup> Chunocoha tonaain erenaa jerihane jaa que irihane, jeriha Cana Coaneranane rijijieein ereein neeine. Chunocoha coroatajanera latihane, ii rai Cana Coaneraacha tei que laraajiin coroatajaneeu. Itolere iicha ichai ichaaine, itolere bana caohachaain ichaaute ii coroatajaniha Cana Coanera aina Jesocurisitone coaraain coroaecuruhine cachaaauru. Acate rai necaohacha que necaohachaain itolere ichana naineraneein ne- chariji bana satonoelanaala. Nitohanemiin.

*Coujuriu Jesocurisito ranojoneein nenea toc-haneein necairichanaa abaantaache.*

<sup>12</sup> Canejeraauru, jiaonriha mainajeein coujunojoneein neriquicheeine que jatoroaelanaala neeichene. <sup>13</sup> Raujiaaincha aihalu Curisitone rijijeein necairichanaa coaraain neeichene nihanatiin rachoojoein neeuche- inae turuha necaohachane bana rachoojoein neriquicheeine jaun. <sup>14</sup> Curisito cachaneein neeichene coreniha inara batohin nei nihanete, nerausiaaequiche jataain caohachaaain nenea Cana Coanera Suujue inara aina nihane jaun. <sup>15</sup> Nitohanihane jaun necoejemiin, sonajaain jaohin, asijaotoneein, leeochoauru rai cotainacai ichaaain, naonjoain ichaane coreniha cairichanojoneein nenea. <sup>16</sup> Jana Jesocurisito cachaneein neeichene coreniha inara casetecaain neinihane, jiaonriha nocoejequichene. Raujiaaincha coreniha Cana Coanera bajaain corojeein neeuche.

<sup>17</sup> Inae cana rai cachanichaachene ichanohi rucuheca Cana Coaneranane cojoanona que turuha. Nitohaneein rai cachanichaachene que nunuhetein, nitohaneein icharichaaainne jaun, chatohaneeururichaaain Cana Coanera ere tonoraelanaala nenacaauru. <sup>18</sup> Coaracuche nachuhinti rai cacha nichaachene saijeein, necairichanaa coaraain nichoterichaacheeine. Nii jaun chatohaneeururichaaain chaainti, nechu aansainein osaaonacaauru. <sup>19</sup> Nitohanihane jaun, Cana Coaneraacha jerei ichaquichene coreniha necairichanaa coaraain neeichene nihanatiin, itolere bana caohacha ichajeein ichaohin, naitoonjoa rijijeein cha ichaeranein

nena Cana Coaunera bijiu inara suujue teeuche.

## 5

*Jesocurisito ranojineein nenacauru suujuat-  
era*

<sup>1</sup> Enane laen nii inara aina ita taojieraauru bichauhenaauru suujuatena jereen. Canuhetonaine acauru rijijieein ichauhenaneein cana coreniha necairichaalu Jesocurisitone beraneein neeun. Nii rijijieeinechu canuhetonai acauru aina jiniiquiin Cana Coaunera Cojoanonaa que nereeunni, inae ecu tihane bana.

<sup>2</sup> Nii inara que Cana Coauneraacha beraichatenojoi, rai cachaneein nenacauru beraihuche. Nii coinatena inara que beraichatenajae Cana Coaunera. Caohachain inara suujua coaraain jeriha Cana Coaunerane rijijieein acauru beraihuche. Jiaonriha inara letoaera lateein core coinaacha ichaquichene. Raujiaain jeriha Cana Coaunerane rijijieein corajeein ichacuche.

<sup>3</sup> Acauru curuaanaaneein nena coacuelanaala, raujiaain caohacha nejesina ichaain neeichene coarateeuche acauru quete, acauru netonai inara caje nerelaaurumii.

<sup>4</sup> Nitohaneein neeichenete, inae turuha cana beraicha esineneei nenaane bana, inara que rai necaohacha que necaohachain nena- comai lauriareein inara couturi que. Nii comai chariji bana setuhin naasaerinaain.

<sup>5</sup> Jana inara enamanaacuru, jerecuruha inara bichauhenaaurune rijijieein neeuche. Satiin ita suujua rijitjoeein ita amurijiriin nena coacuelanaala nii:

“Cana Coaunerate,

itolere amurijiriin nenea jereraauru  
lacuroaeraneein,  
cairichanojoneein nenacaauru cairichaaajoaain  
coaraain  
coroatajaneraneein ne,”

naain niha erenaane que ninae. <sup>6</sup> Aihane jaun  
Cana Coaunera bijihu neein, nii chaque nelati-  
hei rijijieein neeuche. Acate inae ecu tihane  
bana jataain nelateineein neeichene coina icha-  
reein. <sup>7</sup> Coa itolereecha que coacuhin nerero-  
joecaaeriin nihache, itolereecha que inara be-  
rairichaaain Cana Coaunerane jaun.

<sup>8</sup> Aihana jaun caohachaain jataain itolere que  
nainaaain neeuche. Charijieein teeinti jatoraain  
quihane rai netiin nesari ariirijie janolari, nii  
rijijieeinte jatoraain inara ariirijie moconajaera  
inara itajihane coina. <sup>9</sup> Charijieeinijin chatohanai  
que inara sarunaa jereranihane, jiaonriha rijito-  
joeichene. Raujiaaincha nii inaraacha esenetai  
aina cuaain laraajiin, satiin chauratane sacuri-  
taain nenacaauru cana nejeraauru netonai, nii je-  
lai necairichanaa abaantaain neeuruhane coitu-  
cuhin abaantaain neeuche. <sup>10</sup> Nete inae cara-  
jaaajoaain necairichanaa abaantaain neeichene  
baiha, inara coroatajaniha Cana Coaunerane aina  
rauhijiriin baaso ichana coacuelanaala laraajiin  
acaacha esenetaain neriquicheein. Nii jeelai Cana  
Coaunerate, jataain cana belaitohane jaun, rai  
calaohi Jesocurisito aina cuaain cana cotijiaain  
cana raain nelu, rai Cojoanonaa que aina nenea  
coina. <sup>11</sup> Nitohaneein itolere ichana naineraneein  
neeine chaabana satonoelanaala. Nitohanemiin.

*Satono tihane rai nocoiha Fedorone.*

<sup>12</sup> Casuojua rijijieein nenea cana nejera Siribano quene caa quiricha laenaerateun inara rai-chaque tonaelanaala inara suujuatiha. Chaen jataain esinae rauhijiriin inara belaiha Cana Coaunerane jaun, coujunacaniha rausiaenojoeiin neeichene jaanu tihane coitucuhichene coina. Aihane jaun jataain inara belaiha Cana Coaunerane jaun, aca jerihane rijijieein ichaaoche itolere bana.

<sup>13</sup> Janijiin inara raain nihalune rijijieein, Babiloniau janijiin Cana Coaunera ranojoeiin nenaaurute inara coacue. Cacalabi rijijieein nenea- Maroco netonaite inara coacuhe. <sup>14</sup> Ita rene turuhin neeichene, raotojoeiin jiniiquiin ita belaiin ita raain neeuche. Satiin Jesocurisito cachaneein neiniquichene raotojoeiin neeuche.

## **Cana Coaunera Ere** **New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

### **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Urarina

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

b7ea44d4-3dbd-507b-9a19-256b56fe9b07